

**Bukti kerajaan responsif – TPM
Utusan Online
09 Mac, 2012
Oleh raja syahrir abu bakar**

KUALA LUMPUR 8 Mac - Keputusan membatalkan pelaksanaan skim Saraan Baru Perkhidmatan Awam (SBPA) dan kembali kepada Sistem Saraan Malaysia (SSM) membuktikan kerajaan Barisan Nasional (BN) responsif terhadap kepentingan serta kemahuan para penjawat awam.

Timbalan Perdana Menteri, Tan Sri Muhyiddin Yassin berkata, keputusan itu dibuat setelah mengambil kira maklum balas jawatankuasa kerja khas mengkaji pelaksanaan SBPA serta Kongres Kesatuan Pekerja-Pekerja Di Dalam Perkhidmatan Awam (CUEPACS) yang mendapati ia perlu ditambah baik.

Kata beliau, ia membuktikan kerajaan berani serta telus untuk mengakui kelemahan sesuatu dasar serta mengambil kira pandangan para penjawat awam di setiap peringkat.

"Saya tidak fikir dari segi kerajaan kita salah, apabila kita lihat kelemahan dan (mengambil kira pandangan) pegawai kata kaji balik, kita kaji balik. Secara keseluruhan, semua pihak menyambut baik (pembatalan SBPA), bukan sahaja pihak dalam sektor perguruan.

"Walaupun SBPA dimansuhkan dan dikekalkan SSM, tapi ia dengan bentuk lebih baik serta jaminan kenaikan pelarasan gaji yang saya kira amat menarik dan harus memuaskan hati semua peringkat," katanya.

Beliau berkata demikian pada sidang akhbar selepas merasmikan 'MyKomuter' iaitu perkhidmatan Tren Enam Gerabak (SCS) yang terbaru oleh Keretapi Tanah Melayu Berhad (KTMB).

Muhyiddin mengulas pengumuman Perdana Menteri, Datuk Seri Najib Tun Razak hari ini mengenai pembatalan pelaksanaan SBPA dan kembali kepada SSM yang akan ditambah baik.

Sementara itu Muhyiddin yang juga Menteri Pelajaran memberitahu, pelaksanaan kenaikan gred gaji para guru berdasarkan tempoh perkhidmatan Khas Untuk Penyandang (KUP) atau KUP 'Time Based' akan dilaksanakan secepat mungkin pada tahun ini.

Menurut beliau, warga pendidik tidak perlu risau jika ia tidak dilaksanakan kerana kepimpinan kerajaan sentiasa menepati janji termasuk mengenai perkara itu yang telah diumumkan Perdana Menteri pada pembentangan Bajet 2012.

Katanya, perkara itu akan diumumkan oleh Jabatan Perkhidmatan Awam (JPA) dalam masa terdekat ini.

"Sebagaimana Perdana Menteri kata, guru-guru jangan gundah-gulana, apa yang telah dijanjikan dalam bajet akan dipenuhi, jadi dengan jaminan Perdana Menteri itu kita harap ia akan memuaskan hati semua guru," katanya.

Hakcipta Terpelihara © UTUSAN MELAYU (M) BERHAD

Source:

http://www.utusan.com.my/utusan/info.asp?y=2012&dt=0309&pub=Utusan_Malaysia&sec=Dalam_Negeri&pg=dn_01.htm

